



KEMENTERIAN WILAYAH PERSEKUTUAN
Blok 2, Menara Seri Wilayah, Presint 2, 62100 Putrajaya
Tel: 03-8000 8000 Faks: 03-8889 7957
Laman web: www.kwp.gov.my

KENYATAAN MEDIA
UNTUK LIPUTAN MEDIA MASSA

ANJUNG FLORIA BAKAL DIJADIKAN PUSAT REKREASI SETEMPAT PUTRAJAYA

Anjung Floria Putrajaya di Presint 4 yang dahulunya merupakan tapak bagi penganjuran Festival Bunga dan Taman Antarabangsa (FLORIA) Diraja Putrajaya akan dihidupkan sebagai pusat setempat aktiviti rekreasi dikenali sebagai **Pit-Stop@Anjung Floria**.

Tapak ini amat strategik dari segi kedudukannya yang berhubung dengan sisiran Tasik Putrajaya, laluan sikal bandar, laluan sikal dan pejalan kaki sisiran tasik serta laluan cruise yang telah dikenalpasti untuk dibangunkan sebagai tempat persinggahan atau *pit-stop* kepada pengunjung yang menjalankan aktiviti riadah seperti berbasikal, berjalan kaki, berjoging, cruise, sukan air dan berkelah di sekitar Putrajaya. Lebih menarik, kawasan ini berlatarbelakangkan panorama tasik Putrajaya dan beberapa binaan ikonik seperti Masjid Tuanku Mizan Zainal Abidin dan Jambatan Seri Saujana.

Saya telah meminta Perbadanan Putrajaya (PPj) bukan sahaja melakukan penambahbaikan kepada tarikan-tarikan pelancongan yang sedia ada, malah saya telah meminta PPj untuk memikirkan tarikan-tarikan atau **produk-produk pelancongan yang baharu dan inovatif** agar dapat menarik lebih ramai pengunjung ke Putrajaya. Ini selari dengan hasrat untuk menjadikan Putrajaya sebagai **Bandar Rekreasi** yang unggul yang menawarkan pelbagai pilihan aktiviti-aktiviti.

Dengan memperbanyakkan aktiviti yang menarik, lebih ramai pengunjung akan menginap semalam dua atau lebih lama di Putrajaya. Apabila lebih lama lagi pengunjung bermalam dan lebih banyak lagi berbelanja di Putrajaya, ini dapat membuka peluang bagi peniaga dan komuniti setempat menjana pendapatan.

Sebagai **Wilayah Persekutuan, Wilayah Prihatin**, adalah menjadi tanggungjawab Perbadanan Putrajaya untuk mewujudkan lebih banyak peluang untuk rakyat terutamanya komuniti Putrajaya untuk **memperbaiki taraf hidup** dengan menceburi perniagaan-peniagaan yang bersesuaian di kawasan tarikan pelancongan dan rekreasi yang baharu di Putrajaya seumpamanya di Pit-Stop@Anjung Floria dan kawasan-kawasan sekelilingnya. Peluang-peluang perniagaan ini juga dapat membantu penduduk Putrajaya daripada pelbagai latar belakang termasuk belia dan kumpulan profesional yang telah kehilangan pekerjaan akibat pandemik COVID-19 untuk bangun semula. Berdasarkan **keprihatinan** ini kita dapat memberi **kebolehupayaan** kepada mereka yang terkesan untuk berdikari semula dan boleh dibimbing untuk maju dalam perniagaan supaya dapat meningkatkan ekonomi Putrajaya dan menjadikan Putrajaya lebih **menarik kepada pelabur-pelabur**.

Pit-Stop@Anjung Floria akan dilengkapi dengan pelbagai kemudahan yang lengkap dan teratur termasuk tapak ekspo, tapak jualan, nurseri pokok, Kampung Beca, sewaan basikal, kayak, *remote control (RC)*, *cruise*, bot dan *sandy beach* di samping kemudahan rehat dan rawat (RnR) seperti kafe. Usaha-usaha ini dapat menyokong ke arah **pemantapan Putrajaya sebagai destinasi pelancongan serta bandar rekreasi**.

Dalam sesi tinjauan saya ke Anjung Floria pada hari ini, saya turut berkesempatan menanam Pokok Kayu Raja (*Cassia fistula*) sempena KEMPEN MENANAM SATU (1) JUTA POKOK DI WILAYAH PERSEKUTUAN bagi peringkat Putrajaya. Kempen yang berkonsepkan **Hutan Berbunga Dalam Bandar** dengan meliputi antaranya kawasan taman awam, tasik dan rizab jalan adalah salah satu program **Cakna Kehijauan** di bawah inisiatif Wilayah Persekutuan Wilayah Prihatin yang juga selaras dengan Program Penghijauan Malaysia.

Lebih 100,000 pokok akan ditanam di Putrajaya bagi menjayakan kempen ini di mana selain Pokok Kayu Raja (*Cassia fistula*) iaitu pokok ikonik Putrajaya dengan jambak bunga kuning berjuntai, turut akan ditanam adalah jenis pokok hutan seperti Merbau, Merawan, Pulai dan Meranti serta jenis pokok berbunga seperti Semarak Api dan Tekoma. Pada masa ini, Putrajaya yang dibangunkan berkonsepkan Bandar Dalam Taman mempunyai lebih 700,000 tanaman pokok pelbagai jenis dan spesies. Pokok-pokok ini juga dapat dijadikan **tarikan pelancongan** yang menarik.

TAN SRI TPr HJ ANNUAR MUSA
Menteri Wilayah Persekutuan
13 Mac 2021